

LA CONSTITUCIÓN DE LA SOCIEDAD FAMILIAR ENTE XALDOS YA VAQUEIROS NEL CONCECHU DE NAVIA A TRAVIÉS DE LOS CONTRATOS FAMILIARES (1775 - 1874)

ADOLFO FERNÁNDEZ PÉREZ

1. INTRODUCCION

Yía una cousa sabida que na sociedá tradicional el matrimoniu, polo menos no tocante a dellos de los sous miembros, concíbese comu un contratu que tien comu función principal garantizar el mantenimientu ya, no posible, l'aumentu del patrimoniu familiar.

Na rexón asturiana atestigase, en muitos concechos, la existencia d'esti matrimoniu — contratu, xeneralmente antias del matrimoniu eclesiásticu, formalizáu por un acta notarial a la que se chama *contratu matrimonial*, *matrimonial* namás ou *escritura sponsalicia*, anque esti ca-beiru nome suel aferise, nun sen más restrinxíu, a la promesa de matrimoniu ¹. La práutica d'esta costume, en tolas clases sociales, compruébase nel sieglu XIX ya, ente los campesinos, hasta bien entráu'l sieglu XX. El sou estudiu sistemáticu, que ta entovía ensin faer, yía imprescindible pa una conocencia correuta de la realidá económico - social que constitúi'l núcleu básicu de la sociedá tradicional asturiana: el grupu domésticu ².

Nestas páxinas pretendemos faer una aprosimación a la sociedá familiar d'unu de los concechos d'Asturias

nel que la práutica d'esi tipu contratos ofrézsenos más común nel periodu hestóricu comprendíu ente los anos 1775 ya 1874 (2^{bis}). Referímonos al Concechu de Navia³.

2. LA PRÁUTICA DEL CONTRATU MATRIMONIAL NEL CONCECHU NAVIA ENTE 1775 YA 1874

L'esame fondeiru de los protocolos correspondientes a los quince notarios disponibles nel Archivu Hestóricu Provincial d'Uviéu (A. H. P. d'U.), que fixenon el sou llabor nel concechu nel periodu reseñáu, ofreciunos mui bien de masa documental formada por cuasi 3.500 actas de contratos de matrimoniu, cousa que, a simple vista, supón que se trata d'una práutica mui común. Esti gran espardimientu hai que lu poner en relación cono feitu de que tal actu xurídicu, desendolcáu por dreitu consuetudinariu de la nuesa rexón, yía un procedimientu esencial nel que s'afita l'axeitamientu del grupu domésticu ya garantizase tamién la tresmisión ensin estremar el patrimoni u nel que s'afita'l sou prestixu ya supervivenvia⁴.

Entrambos oxetivos, que nun quitan qu'haiga outros comu'l del aumentu del patrimoni u pola incorporación del dote, alcánzase usando, nos matrimoniales del concechu, unu de los recursos carauterísticos del sistema hereditari u tradicional castellanu, que yía la mechora nel terciu ou nel quintu al fichu (a) que «*casa en casa*». Esta yía la finalidá del contratu matrimonial, firmáu delantre'l notari u, nel 59,1% del total de los mesmos, lo que quier dicir que nel espaciu temporal que va dende 1775 a 1874, emplegóuse esi procedimientu 2.060 veces. Esto afita la nuesa sospecha de que por mor d'esas actas notariales asegurábanse, ente los grupos familiares, los oxetivos apuntaos ya por eso recuérrase a esti procedimientu xurídicu⁵.

3. EL COMPORTAMIENTO MATRIMONIAL YA LA ORGANIZACIÓN DE LA SOCIEDAD FAMILIAR NEL CONCECHU NAVIA A TRAVIÉS DE LOS CONTRATOS DE MATRIMONIU PROTOCOLIZADOS ENTE 1775 YA 1874

3.1. *L' análisis de la fonte* ^{5 bis}

Las actas notariales de matrimoniu muéstranse comu una fonte a través de la que yía posible axeitar interesantes datos, comu yá diximos, no tocante a los cimientos económico-sociales nos que s'afita la constitución del grupu domésticu ya las normas xurídicas que rixen nel concechu la tresmisión de la herencia. Entrambos aspectos vense nas aportaciones que, pa la formación del grupu, faen los familiares del noviu ya de la novia. Yía frecuente tamién, especialmente cuando nos contratos apaer la mechora, que s'especificuen las condiciones que rixirán la convivencia ente los componentes de la sociedad familiar feita con esi recursu xurídicu.

Pero amás d'esa información que por sí mesma valora positivamente la fonte, ésta ofreznos, comu encabezamientu, la fecha de cuándo se fixo'l contratu ya la ficha personal de los contrayentes. Nella apaecen los nomes ya apellíos de los otorgantes de la escritura matrimonial, indicando cuál yía la relación que xune a los novios, el llugar de residencia de tous ellos —que cuasi siempre abarca'l concechu, la parroquia ya'l llugar—, l'estáu civil de los contrayentes, el grau de consanguinidad, nel casu de qu'haiga tal relación, el grupu social a que pertenecen. Asina somos a disponer d'un cuasi perfeutu dossier pal conocimientu de los encuestaos ya dáse-ll y amás más sentíu a la parte dispositiva del documentu ⁶.

Afitándose nos elementos referenciales disponibles, lo primero que pue constatase yía que, nel Concechu Navia, el recursu al contratu matrimonial, feitu delante notariu, yía un xacer propiu cuasi namás del campesináu ⁷. Sumaos los llabradores cultivadores ya propietarios vienen ser, en conxuntu, el 97,0% de los contrayentes. Yía

claro que, entós, si queremos falar del comportamientu nel matrimoniu ya de la organización de la sociedad familiar nel concechu nel periodu estudiáu, afitándonos namás na nuesa fonte, hemos amirar al mundu rural. Pero por mor d'un análisis más pormenorizáu de la documentación apaez una interesante diversificación, comu resultáu de la coexistencia nel Concechu de dous grupos sociales rurales que practican xeitos de vida estremaos. Referímonos a los campesinos sedentarios (*xaldos* ou *marquetos*) ya a los *vaqueiros d'alzada*. Unos ya outros apaezen estremaos por una fuerte separtación afitada en contradicciones de carácter étnicu-relixosu, que tienen comu fundamentu creencias ya tradiciones, reales ou ficticias, pero entovía actuantes nesti momentu hestóricu. N'efectu, el conxuntu de los chamaos *vaqueiros d'alzada*, que tienen un xeitu de vida esencialmente ganaderu ya treshumante, interfier ya choca periódicamente colas actividades ya costumes de los llabradores sedentarios, al asitiase, nas parroquias del interior del Concechu, dalgunas brañas de las chamadas d'iviernu, cousa que produz enfrentamientos abondos que nun son tema d'esti trabachu. Pero, amás, los Protocolos notariales del Concechu conservan nas suas actas la güelga de la sua presencia, concretada, nel casu los contratos matrimoniales que remanamos, nel 15,5% (53 actas) del total de los 340 qu'abarca la nuesa.

Disponemos, poro, d'un bloque d'escrituras de matrimoniu, perfectamente identificadas comu obra de *vaqueiros*⁹, que fain que seyamos a penetrar nel conocimientu la sociedad familiar d'esti grupu social ya, relacionándolu col comportamientu qu'al mesmu tiempu practican los sous rivales ya asina contribuir a entender dous xeitos de vida tan próximos, xeográficamente falando, pero, al mesmu tiempu, tan diferentes.

3.2. *Predominiu de la exogamia familiar ya local en contraste con una fuerte inclinación a la endogamia social.*

L'análisis de los contratos matrimoniales na parte

correspondiente a las cláusulas declaratorias, qu'axeitan l'entamu, produz resultaos que, con pequenos matices, reflexan comportamientos abondo similares ente los llabradores sedentarios ya los vaqueiros d'alzada. (Cuadru n.º 1).

Ente los miembros d'entrambos grupos, que van al Notariu pa llegalizare las suas Escrituras de matrimoniu, veise una clara tendencia a la exogamia familiar ya llocal al faere nuevos matrimonios. Obsérvense, nel cuadru citáu, los altos porcentaxes de contrayentes, sedentarios ya vaqueiros, que proceden de distintos llugares (74,0% ya 79%) ya tamién mui grandes no tocante a los procedentes de diferentes parroquias (45,4% ya 47,6% respectivamente). Hasta son abondos (el 20% del total de los contrayentes) los que proceden de diferente Concechu.

Pola cueta, dase respetu a esta poderosa exogamia xeográfica una aplastante endogamia social (100% ya 96,2%) que supón la busca de parexa nel mesmu nivel, actitú clásica de tolles sociedaes tradicionales, pero que nel casu los vaqueiros quier dicir, amás, movese, cuasi exclusivamente, dientru d'un grupu separtáu ya delimitáu por pretendíos rasgos étnicos que dixeban.

Amírese, finalmente, pa la pouca incidencia de matrimonios ente consanguíneos nos dous grupos que venimos contrastando, couse que, por outra parte, paez lóxicu corolariu de lo exogamia xeográfica comentada.

Tous estos resultaos merecen, a la lluz d'otros trabachos yá feitos ya teniendo en cuenta las peculiaridades de la nuesa fonte, unas poucas llinias interpretativas.

Fai falta, en primer llugar, destacar el feitu oxetivu de que los contratos matrimoniales delante notariu, aunque frecuentes nel concechu comu yá se víu, refiérense namás a dellos de los matrimonios celebraos. Ya por mor de la fuerte relación ente contratu matrimonial ya mechora podemos afirmar que, en cada periodu xeneracional, cada grupu domésticu práuticamente namás fairía participar a unu de los sous miembros, de xeitu direutu, en tal actu xurídicu. Lluenxe del nuesu análisis quedan los otros componentes, de los que l'actitú endogámica ou

C U A D R U N.º 1

*Endogamia ya exogamia nel concechu de Navia a través de los contratos matrimoniales (1775-1874) **

GRUPO SOCIAL	PROCEDENCIA GEOGRAFICA DE LOS CONTRAYENTES												CONSAINGUINIDA			PROCEDENCIA SOCIAL DE LOS CONTRAYENTES (GRUPO SOCIAL)		
	CONCECHU			PARROQUIA			LUGAR											
	M	D	E/C	M	D	E/C	M	D	E/C	SI	NO	M	D	E/C				
Campeñinos Sedentarios	253 88,2%	34 11,8%	0 0%	122 42,5%	130 45,2%	35 12,1%	74 25,7%	213 74,2%	0 0%	18 6,2%	269 93,7%	287 100%	0 0%	0 0%				
Vaqueiros	42 79,2%	11 20,7%	0 0%	23 43,3%	25 47,1%	5 9,4%	11 20,7%	42 79,2%	0 0%	4 7,5%	49 92,4%	51 96,2%	1 1,8%	1 1,8%				
TOTAL	295 86,7%	45 13,2%	0 0%	145 42,6%	155 45,5%	40 11,7%	85 25,0%	255 75,0%	0 0%	22 6,4%	318 93,5%	338 99,4%	1 0,2%	1 0,2%				

* Indícase'l número ya'l porcentax.

M = MESMU
D = DISTINTO
E/C = ENSIN CLASIFICAR

exogámica namás seríamos a comprobar usando outras fontes que tan fuera de los lëndones d'esti trabachu ¹⁰.

Amirando pa los vaqueiros d'alzada yía perconocida la opinión, dende Xovellanos hasta güei, de que yía ente ellos una práutica común la endogamia grupal ya local ¹¹, conas consecuencias negativas qu'esto trai darréu: potenciación del aislamientu del grupu social ya falta de cohesión interna, porque cada unu de los llugares ou pueblos de vaqueiros taría aisláu de los outros ensin el *comerciu sexual*. Esta foi la razón de la supuesta abundancia de matrimonios ente consanguíneos, hipótesis que yá nel sieglu XVIII atopó un primer valedor en Miguel de Lardizábal.

Pero nun innovador artículu d'Adolfo García Martínez ¹³, l'autor, usando los «Libros de Bautismo y de Matrimonio de la Parroquia de Santa María del Puerto de Somiedo», que van dende 1820 hasta güei, chega a conclusiones abondo diferentes de las tradicionales. Ya, dempués d'asegurar, polo que se refier a la esistencia de llazos de consanguinidad, que «se diría más bien que existe el propósito firme, por parte del grupu, para evitar dichos lazos entre los cónyuges» ^{13 bis}, l'autor diznos tamién que «en definitiva, podemos afirmar que la estructura de parentesco de los vaqueiros de alzada de Somiedo refleja una endogamia grupal y una clara tendencia hacia una exogamia entre los distintos pueblos» ¹⁴.

Comu pue vese, usando escrituras de matrimoniu nun marcu xeográficu ya hestóricu distintos de los cubiertos por Adolfo García Martínez nel sou artículu, las conclusiones a que chegamos, respeutu al grupu social vaqueiru, son práuticamente las mesmas: endogamia grupal, exogamia xeográfica ya baxu índiz de xuntura matrimonial consanguínea.

Pero al interpretar los móviles qu'emburrian a estas actuaciones ya, ensin perdere de vista que los contratos matrimoniales namás se refieren a los comportamientos de mui pocos elementos del grupu, que, amás, van detrás d'unos oxetivos puramente económicos, yía difícil

almitir que la práutica de la exogamia xeográfica va debese a la busca, más ou menos inconsciente, d'una solidaridá grupal afitada nel comerciu sexual ^{14 bis}. Paeznos, más bien, que los protagonistas de la nuesa fonte actúan por motivos más triviales, condicionaos pol matrimoniu-contratu tradicional, que, nel casu concretu de los vaqueiros d'alzada, significa la necesidá ya'l deséu de los familiares d'alcontrare'l mechor partíu posible (ou seya, xeneralmente'l mechor dote) nun mercáu matrimonial que la endogamia grupal restrinxo mui. Poro, la solidaridá llograda paeznos más un resultáu d'una situación económica determinada que comu'l productu d'un primariu instintu de supervivencia d'un grupu que se ve acosáu polos que lu arroddian, por mor del xeitu de vida estremáu que prautican.

D'outru llau, la dispersión de los llazos de solidaridá causada pol matrimoniu-contratu en forma de círculos concéntricos, representaos pol llugar, la parroquia ya'l concechu, alcontrámosla tamién ente los campesinos sedentarios del Concechu, anque non tan acentuada comu ente los vaqueiros (ver cuadru n.º 1). Esto débese, probablemente, a que yía más fácil atopar un dote adecuáu nun círculu más pequenu pola existencia d'un mercáu matrimonial con un númeru más grande d'ufiertas.

En resume, pue concluíse que, anque haiga que reconocer la fonda tendencia comunitaria de los campesinos, pa muios d'e'llos yía difícil por demás seguir una endogamia perfeuta xeográficamente al tener que cumplir una estratexa matrimonial dominada polos intereses económicos, mui acentuaos cuando hai una interrelación de mechora ya dote nun mesmu contrat. Comu pue vese nel Cuadru n.º 2, cuando entrambas van xunidas faen qu'hai un incrementu relativu de las tendencias exogámicas (compárense los porcentaxes de los Cuadros 1 ya 2) ¹⁵.

3.3. *La práutica de la mechora:*

Del mesmu xeitu que los imperativos económicos suelen presidir l'axeitamientu del llazu matrimonial, una de

C U A D R U N.º 2

*Endogamia ya exogamia xeográfica nel concechu de Navia a través de los contratos matrimoniales con mechora (1775-1874) **

GRUPO SOCIAL	PROCEDENCIA XEOGRÁFICA DE LOS CONTRAYENTES									
	CONCECHU			PARROQUIA			LLUGAR			
	M	D	E/C	M	D	E/C	M	D	E/C	E/C
Campeſinos Sedentarios	107 64,0%	60 35,9%	0 0%	66 39,5%	97 58,0%	4 2,3%	37 22,1%	130 77,8%	0 0%	0 0%
Vaqueiros	27 79,4%	7 20,5%	0 0%	10 29,4%	22 64,7	2 5,8%	8 23,5%	26 76,4%	0 0%	0 0%
TOUTAL	134 66,6%	67 33,3%	0 0%	76 37,8%	119 59,2%	6 2,9%	45 22,3%	156 77,6%	0 0%	0 0%

* Indicase'l número ya'l porcentax.

M = MESMU(A)

D = DISTINTO(A)

E/C = ENSIN CLASIFICAR

las funciones principales de la familia, en constituyéndose, yía la conservación ya tresmisión del patrimoniú. Nel dereitu tradicional castellanu la institución xurídica chamada mechora xuega un papel destacáu comu oxetu de llograr los dous fines mentaos. Entiéndese por tal la posibilidá que tien l'otorgante de la mesma de da-llly dalguna ventaxa a dalgún heredeiru respetu a los outros nuna parte de la sua herencia, antias de faere las llexítimas.

Na rexón asturiana, nel periodu hestóricu que va ente 1775 ya 1874, la práutica de la *mechora* yía mui frecuente na zona occidental ¹⁶ ya da-llly al beneficiariu de la mesma la posibilidá d'aproveitase, antias de la partición, del *terciu* de los bienes disponibles (yía'l chamáu *terciu de mechora*), al que se-llly pue axuntar el *quintu* de llibre disposición. Esto si lu traducimos a cifras quier dicir que l'heredeiru ou heredeiros mechoraos recibe un 46,6% del capital líquidu a partir, amás de la llexítima correspondiente ^{16 bis}. El dreitu sucesoriu, vixente nel sieglu XIX, tenía previstas duas vías principales pa tresmitir el patrimoniú: la testamentaria ya la feita gracias al contratu matrimonial ¹⁷. Pue recurrise a cualquiera d'estos dous procedimientos al faere la mechora, pero comu con ésta búscase, amás d'una estratexa hereditaria un fundamentu de tou un sistema de relaciones familiares ente dador(es) ya receutor(es), yía natural que, comu yá se dixo en páxinas anteriores, el contratu matrimonial seya'l que s'es-cueye comu mediu más axeitáu ¹⁸.

Comu pue vese nel Cuadru n.º 3, nun altu porcentax de matrimonios (cuasi'l 60%), amechórase a unu de los contrayentes, siendo práuticamente la mesma la conducta los vaqueiros ya los sedentarios ¹⁹. Ya si tenemos en cuenta, tal comu venimos diciendo, que nel Concechu de Navia recuérrese muitu a la escritura matrimonial protocolizada, l'exame de la *mechora* ya las condiciones nas que s'aplica son un procedimientu muitu útil pa entender de llas normas vitales que rixen nel grupu domésticu nesti concechu ya, por estensión, en tola zona xeográfica d'expansión d'esta norma xurídica.

Hemos destacar, primeramente, que'l contrayente

C U A D R O N.º 3

La práctica de la mechora nel concechu de Navia a travéis de los contratos matrimoniales * (1775 - 1874)

GRUPO SOCIAL	AMECHORAU (ADA)		TOTAL	TIPI DE MECHORA					OTORGANTES DE LA MECHORA			
	NOVIU	NOVIA		T/Q	T	T/A	R/M	P/M	M	P	O	
Campesinos Sedentarios	157	10	167	129	4	14	11	84	49	31	3	
	94,0%	6%	58,1%	77,2%	2,3%	13,7%	13,7%	50,2%	29,3%	18,7%	1,7%	
Vaqueiros	34	0	34	30	1	0	3	20	6	4	4	
	100%	0%	64,1%	88,2%	2,9%	0%	8,8%	58,8%	17,0%	11,7%	11,7%	
TOTAL	191	10	201	159	5	14	14	104	55	35	7	
	95,0%	4,9%	59,1%	79,1%	2,4%	6,9%	6,9%	51,7%	27,3%	17,4%	3,4%	

* Indíquese'l número ya'l porcentax.

T/Q = TERCIU YA QUINTU

T = TERCIU

T/A = TERCIU YA QUINTU MAS BIENES ARENDAOS

R/M = RATIFICACION DE LA MECHORA

P/M = PÁ YA MA

M = MA

P = PÁ

O = OUTROS

amechoráu yía l'home nel 95% los casos de matrimoniu estudiaos. El recursu a la novia yía nulu ente los vaqueiros encuestaos ya namás apaez nel 6% los matrimonios ente campesinos sedentarios. En realidá nun hai alternativa: amechórase a una ficha por nun tener fichu varón dengunu. Diríase que, hasta nestos casos, actúase a contrapelu, pues nun faltan exemplos de contratu matrimonial en que los causantes de la novia faen sociedá familiar con e||a ya'l sou futuru home, nun la dotando más que pa «*en caso de separación*», cuando lo más normal nestos casos yía, comu dempués podrá vese, proceder a la mechora ²⁰.

En segundu llugar fai falta dexar constancia de que l'orde de prelación na eleición del herederu aventaxáu, cuando hai que decidir ente varios fichos, yía, regularmente, el de la primoxenitura. Nun hai norma llegal qu'obligue, ya tous son conscientes d'ello, pero la necesidá d'un alcuerdu tácitu pa que nun haiga disputas, la mayor probabilidad que tien el fichu más grande de casase ya faere asina antias la constitución de la sociedá familiar, ou, finalmente, la influencia nas clases populares de la institución xurídica nobiliaria del mayorazu consolidanon una costume vixente hasta'l final del periodu eiquí estudiáu. Pero los contratos matrimoniales nun son mui esplicitos al determinar si'l fichu mechoráu yía ou non el primoxénitu. Namás los notarios qu'actuanon dempués de la implantación de l'alministración lliberal, que llys esix más minuciosidá al faer los protocolos, precisan esa condición. Sicasí, si nos fitamos n'outras fontes, comu los testamentos, confírmase la hipótesis de la primoxenitura, pues el testador ou testadores al faer la enumeración de los sous fichos fáenlo por rigurosu orde descendente ya siempre'l mechoráu yía'l que s'asitia nel primer llugar ²¹.

Siguiendo cona interpretación del Cuadru n.^o 3, ya en precisando a quien s'amechora, interésanos comprobar el cómo s'amechora. Los porcentaxes llograos confirman que'l mandar «*el tercio y remanente del quinto*» yía'l procedimientu más utilizáu. Namás nel 2,4% los casos la me-

chora reduce al terciu de la herencia, media porcentual prácticamente idéntica ente xaldos ya vaqueiros. Cuasi'l 7% los matrimoniales con mechora llimítanse a ratificar la decisión tomada yá con anterioridá²¹, ensin qu'haiga muitas diferencias ente los dous grupos sociales comparaos. Ya, finalmente, namás ente los campesinos sedentarios alcontramos dalgunos exemplos nos qu'a la tradicional mechora axúntase'l dreitu a suceder nos bienes arrendaos. Pue interpretase comu síntoma del avance del sistema d'esplotación agraria impuestu poucu a poucu pol lliberalismu burgués²².

En resume, campesinos sedentarios ya vaqueiros del Concechu de Navia usan la llexislación vixente en materia hereditaria pa beneficiar unilateralmente a unu de los sous heredeiros. En más del 90% los casos el mechoráu dispón del 46,6% de los bienes (suma del terciu ya'l quintu) antias d'entrar nas posibles particiones cono restu los heredeiros. ¿Qué se busca con esti tipu de conducta? Naido pon en dulda que la finalidá yá llograr que las sucesivas tresmisiones hereditarias nun dixebren el patrimoniu. Otru tema yá cómu ser a faer esto nel 53,4% onde nun hai mechora. Afitándonos nos nuestos datos podemos aventurar que'l grupu familiar tien soluciones pa llogralo. En primer llugar, l'heredeiru amechoráu tien dreitu a apropiase del 46,6% del patrimoniu «a su elección y escosecha» ou «por lo más bien parado de los bienes», según monótona pero ensin dulda intencionada espresión, arrechida nos contratos matrimoniales. Yía la primera previsión xurídica p'apoderase de lo que yá más apreciáu nuna sociedá de base agrícola ya pastoril: los bienes raíces. Pero anque éstos valgan más que la mechora, quedallu el recursu de la llexítima pa dexar a los heredeiros fuera de la sucesión nel restu los bienes inmuebles, fayendo los posibles pa usar la sua pa tomar las mesmas ya satisfacer las de los outros pagándolas en muebles ya/ou semovientes. El deber que contrái'l mechoráu d'audar ya participar na colocación del restu «las obligaciones familiares»²³ servirallu a él ya a los otorgantes pa proceder en consecuencia, axustando no posible'l valor de lo entregáu al que s'emancipa al de la llexítima²⁴ ya, pagándo-

la en bienes non raíces, dexándolu ensin la posibilidá de faese con aquellos nos que s'afita'l patrimoniu rústicu.

Pero pola mechora nun s'establez namás la base d'un xeitu d'entender la tresmisión de patrimoniu, sinón que tamién se-llly da forma a un grupu domésticu, regulando, al mesmu tiempu, las normas contractuales que rexirán durante la sua esistencia. Asíéntase asina en cada explotación agrícola («caseríu», dizse nel Concechu) un grupu familiar feitu por dos grupos asociaos: el constituíu pol nuevu matrimoniu, proyeutáu pol correspondiente contratu matrimonial ya'l constituíu polos ascendientes del mechoráu que, nel 51,7% los casos son, al formase, el pá ya la ma del mesmu. (Ver outra vuelta'l Cuadru n.º 3 nel epígrafe «Otorgantes de la mechora»). Esti núcleu ascendente pue tar yá reducíu a unu namás de los sous miembros, nel 27,3% a la ma ya nel 17,4% al pá, con poucas diferencies, que paecen traducir una más grande o más pequeña precocidá na constitución del grupu domésticu, ente los vaqueiros ya los campesinos sedentarios. N'otros casos (el 3,5% del total) al llau del pá ya/ou la ma otorgantes figuran comu tales otros parientes del contrayente (tíos, buelos) que dicen muitu de la complexidá que pue chegar a tener el grupu domésticu si se tien en cuenta qu'hai que contar, amás, cona probable esistencia de los hermanos del mechoráu entovía non emancipaos.

Fórmase asina so la base de la unidá de producción que yía'l *caseríu* un grupu domésticu —en terminoloxía de P. Laslette «*ménage*» múltiple ya na más clásica de F. le Play *familia patriarcal, troncal o «souche»*— del mesmu xacer que la esistente n'outras zonas d'Asturias, onde'l sistema d'esplotación agraria básase na «casería» arrendada ya aplicable nel nuesu casu tantu al grupu social vaqueiru comu al de llabradores sedentarios. Ello nun significa que dientru del mesmu mundu rural nun haiga outru tipu de construcciones familiares más simples, pero pol papel económicu ya social que xuega esti modelu de familia yía natural que seya'l que dea la tónica de la zona. Fai falta destacar tamién, anque paeza evidente por demás, el caráuter temporal de la familia troncal. La sua

duración ta en función de la supervivencia del contrato pol que se constituyú ya al que se lly pue dar por termináu por rescisión o, más frecuentemente, pola desaparición física d'una de las partes, dexando abierta la vía pa la reproducción del procesu.

Esta comunidá contractual reconocida llegalmente ya formada por razones económicas, funciona, mientras dure, comu una mancomunidá de producción (los sous componentes han collaborar, no posible, nel trabachu del «caseríu»), de consumu (vivir «a mesa y mantel» o «a pan y cuchillo» según indicación feita frecuentemente polos contratos matrimoniales) ya asistencial, en cuantas que «*el casado en casa*» ya la sua mucher deberán ayudar «a colocar al resto de los miembros de la familia», ausiliar a los sous viechos na necesidá ya na enfermedá ya, en terminando la sua vida, enterralos ya fae lly el funeral «*de acuerdo con los medios disponibles*», comu se diz en dellos casos, ou, comu se diz n'outros, «*según su clase*»²⁶. Pero l'acta notarial consagra al mesmu tiempu dientru del grupu familiar una relación xerárquica, reflexu de la que s'atoupa nel restu la formación social, na que'l núcleu descendente queda en situación de dependencia respetu al núcleu ascendente, otorgante de la mechora. Los contratos matrimoniales repiten, con machacona insistencia, comu condiciones indispensables pa la sua vixencia que los contrayentes seyan, dientru la mancomunidá acabante faese, sumisos, respetuosos ya obedientes pa conos sous viechos. Ya, anque paeza un tópicu, nun hai que s'escaecer de que'l discursu notarial, tantu nel dreitu matrimonial comu n'outros casos, yía espresión de la reflexión que fai la sociedá respetu a sí mesma. Las condiciones puestas pa la tresmisión de la mechora ya pal casu de que desfaiga la sociedá familiar afitan esa relación de dependencia del que, un día ou outru, será'l petruciu de la casa ya, en principiu, tien el sou futuru cuasi resuelto, pero tien el presente, evidentemente, comprometíu. Asina, la mechora faise pa entamar la sua vixencia «*después de los días de los causantes*», conservando éstos, mientras tanto, l'usufructu de la mesma ya, entós, la posibilidá de fae-

re una revocación nel casu d'incumplimientu de lo pautao. Pero, entovía más, si se chegara al alcuerdu de desfaer la convivencia «*por incompatibilidad de los genios*» las cláusulas del contrato apaecen mui duras pa conos componentes del núcleu descendente si son ellos los que fixenon los movimientos primeiros pa la rescisión. Dizse, por exemplu, que «...Si sucediese, que Dios no lo permita, que por voluntad y antojo, de los contrayentes, éstos se separasen de la compañía, en este caso no tendrá efecto la mejora referida de tercio y quinto; mas si por disposición de los mandantes fuesen separados dichos contrayentes, entonces aquéllos entregarán a éstos, en el acto de la separación, el tercio enteramente de todos sus bienes...»²⁷.

Conclúisi, entós, que la institución xurídica de la mechora ofrézsenos comu l'eix alredu del que s'estructura un grupu domésticu según el modelu de familia múltiple o troncal, asentáu nun patrimoniu ensin dividir, ya nel que queda garantizáu, con poucas esceiciones, un sistema hereditariu patrilineal, unilaterial ya de residencia virilocal.

3.4. *La importancia del dote.*

Dende un puntu vista xurídicu defínese'l dote comu la propiedá que la mucher lleva al matrimoniu, en casu nun ser ella la mechorada, cargándola a cuenta de la correspondiente lexítima²⁸. Anque los bienes d'entrambos esposos allúganse en réxime de comunidá ya rexentaos pol home, el dote yá inalienable ya ha ser restituíu dafeitu pola muerte del mesmu, anque seya a costa de los sous propios bienes²⁹.

Las escrituras notariales de matrimoniu atestiguan la xuntura indisoluble ente la mechora comu aportación de la familia del noviu ya'l dote que yá'l salvoconductu que lly da a la contrayente la posibilidá d'integrarse nel nuevu grupu domésticu del que pasa a formar parte. Yá verdá que non siempre'l dote apaez comu complementu de la mechora, pues hai mui bien d'exemplos nos que'l

contrayente lléndase a faer aportación de la sua llexítima, ou un determináu capital a cuenta d'ella. Ya yía tamién verdá qu'en dellos poucos casos el grupu domésticu axéitase alreduro de la dotada. Pero lo que define dafeytu los vezos del concechu yía l'adecuación ente los dous componentes básicos del matrimoniu-contratu, o seya, la mechora ya'l dote. Interésallys a otorgantes ya receptores conocer el valor ya la composición del dote, concebiu comu un mediu pal engrandecimientu la sociedad familiar na que la dotada vien a inxerise, aunque en dellos casos lléndase a salvalu²⁹. Sicasi los contratos de matrimoniu de la nuesa muestra nun son siempre explícitos nesti aspeutu ya nun faen fácil chegar a conclusiones, pero, en tou casu, dannos una interesante información que, bien usada, permitíunos deducir pautas de comportamientu ya vezos familiares con importantes diferencies nos dous grupos sociales que venimos contrastando: campesinos ya vaqueiros d'alzada.

Nos contratos matrimoniales nun se diz siempre cuál yía'l valor total del dote. Ente los campesinos sedentarios dizse en 190 contratos (55,8%), obteniéndose una media de 247 «ducados», resultáu de variables que van de los 91 a los 1.000 ducaos, siendo los valores más repetíos los que figuran ente los 150 ya los 300 ducaos, que son el 40,7% del total ya d'ellos los dotes de 200 ducaos chegan al 23,2%. Los vaqueiros d'alzada presentan comparativamente dellas diferencies. Na muestra obtenida namás 11 contratos (20,7%) recuechen el valor global, saliendo una media de 416 ducaos, cociente d'una suma de valores que van de los 200 a los 1.000 ducaos, siendo 300 ducaos (36,3%) lo más xeneralizao.

Pero lo que suel ser más frecuente yía que nun apaez el preciu total del dote, polo menos nos matrimonios vaqueiros, estipulándose, namás, la cantidá a pagar de dineru «contante y sonante» ya, ensin dallys el sou valor, faise relación d'outros componentes que veremos nas páxinas que siguen darréu. Las novias que llavan un dote descritu nestos términos son 124 llabradoras sedentarias (36,4%) ya 42 vaqueiras (79,2%), fayendo aportación en

dineiru una media de 269,2 ducaos ya 327,6 ducaos respectivamente.

Tien especial interés pa los participantes nel compromisu matrimonial, la forma de pagu del dote. En mui bien de casos páutase la forma de faelo pa la cantidá en metálicu, mientras n'outros espúrrese a la totalidá. Parte de la mesma pagábase antias del día de la boda ou nel de la sua celebración (el 54,9% del total ente los campesinos sedentarios ya'l 47,2% ente los vaqueiros) ya abonábase'l restu d'alcuertu con un sistema de plazos d'unos anos de duración (duración media de 3,5 anos ya de 6 anos pa unos ya outros) ya con una cantidá igual en cada plazu.

Na descripción del dote de los llabradores sedentarios l'esmolimientu pola precisión termina xeneralmente cona concertación de plazos. Dempués atoupamos un «*silenciu*» nos documentos que nun porcentax grande (45,5%) apuntan namás que'l restu, cuando parte págase en dineiru efeutivu, ou'l total, nel casu contrariu, pagarase en «*bienes, vestidos y ajuar*». De'llos contratos son más claros ya por ellos podemos chegar mechor a la realidá qu'hai tres de l'ambigua frase anterior. Asina, no tocante a los «*bienes*» nunos pocos casos (7,7%) los mandantes dexan la esplotación de de'llos fincas (una o dous, normalmente) arrendadas ya forales. Ya en nueve ocasiones considérase comu parte del pagu del dote'l pagar el costu de la dispensa de consanguinidad: en de'llos casos el total, n'outros la mitá (la outra mitá págala la familia del noviu). El «*ajuar*» hailu, yía verdá, ente las novias de los campesinos sedentarios; pero, comu llueu veremos, nun yía niciu de los mesmos síntomas de riqueza que nos vaqueiros d'alzada. Las «*ropas de uso diario y festivo o domingueras*» de los contrayentes son, en mui bien de casos, un componente del mesmu: méntase nel 59,7% de los matrimoniales de la muestra. El «*vestido de boda según costumbre entre labradores*» ou «*según la calidad y estado de la novia*» apaez recochíu en 35 casos (12,1%). Pero ente las roupas d'usu personal namás 5 veces (1,7%) se recuechen las chamadas «*de adorno*»³⁰. ¿A qué se debe esta falta d'interés por precisar los elementos del axuar

personal? Ensin dulda nun yía una simple cuestión de formulismu notarial, pues nun mesmu escribanu alcontramos diferentes planteamientos nestas descripciones. Tampoucu pue ser porque se-llys dea poucu valor a estas cousas³¹. Cenciellamente pensamos que nun hai descripción porque nun hai más prendas que las que se mentan. Contribuí a fitar esta hipótesis el feitu de que cuando se fai alusión a las roupas pa la casa, aunque namás se faiga nel 27,7% de los contratos, siempre hai una detallada relación de las mesmas, precisando'l sou númberu, el tipu de tela ya mesmamente'l color ya estáu de conservación («mantas de lana del país, nuevas o viejas», «servilletas», «almohadas de tapido o lienzo», «manteles», etc.). Obsérbase la mesma actitú cuando se faen referencias a oxetos caseiros³². Por tou ello podemos deducir que nel axuar de los campesinos nun hai llugar pa cousa superflua denguna.

Los matrimoniales del grupu social vaqueiru son abondo diferentes. La sua más grande plasticidá apúrrenos dellos rasgos del sou vivire ya, al mesmu tiempu, danos una impresión de riqueza que nun atoupamos nos matrimoniales de los sedentarios. Respeutu a los bienes que forman el dote tien muita importancia'l ganáu, de diferentes especies ganaderas, que-llly da más valor global. Cuasi yía aneudóticu qu'una novia de la muestra lleve «un cubo de avejas»; pero nun yía anéudota la presencia de cabras, uvechas ya vacas en 4 (7,5%), 17 (32,0%) ya 21 (39,6%) de los contratos de matrimoniu. Yía la espresión d'una economía principalmente ganadera na que las especies anteriores son cuasi imprescindibles na formación del grupu domésticu. No tocante al ganáu pequenu (cabrinu ya de llana) el númberu d'animales que suel ufiertar cada dote yía, xeneralmente, seis o múltiplu de seis (doce ya venticuatro comu muiitu). Pero respetu a las vacas nun hai cupu: las cifras van dende un res hasta ochu (xeneralmente «vacas paridas o preñadas»), siendo tres la media del total.

L'axuar yía un componente fundamental del dote de las novias vaqueiras. Apaez en cuasi tolos contratos

CUADRU NÚMBERU 4

L'AXUAR DE LAS NOVIAS VAQUEIRAS, SEGÚN LAS ESCRITURAS MATRIMONIALES (1775-1984) *

1.—Las roupas d'usu personal.

a) Roupas «de adorno»

— Mantiellas: 43,3%	- De pañu negru ordinariu: (1) (1) (1) (1) (1) (1) (1) - De pañu de Segovia: (1) (1) (1) (2) (1) (1) (2) (1) (1) - De bayeta negra: (1) (1) (1) (1) - De bayeta blanca: (1) (1) (1)
— Xubones: 15,0%	- De pañu de Segovia: (1) (1) (1) (1) - Ensin especificare: (1) (1) (1) (1)
— Mandiles: 37,7%	- De sempiterna: (1) (1) (2) (1) (2) (1) (1) (2) (1) - De sempiterna color flor de romeru: (1) - Nuevos: (2) (2) (1) (2) - Viechos: (2) (1) (2) (2) (1) (1)
— Enaguas: 20,7%	- Nuevas: (2) (2) (1) (2) - Viechas: (2) (2) (2) (2) - De bayeta azul: (1) (1) (2)
— Dengues: 22,6%	- De terciopelu: (1) (1) (1) - De bayeta: (1) (1) (1) (1) (1) (1) - D'escarlata: (1) (1) (1)
— Almillas: 18,0%	- De pañu nuevas: (1) (1) (1) - De pañu viechas: (1) (1) - De sayal nuevas: (1) (1) (1) - De sayal viechas: (1) (1)
— Xustiellos: 20,7%	- Ensin especificare: (4) (4) (2) (2) (1) (3) (2) - De monfor: (1) (1) - De presiana: (1) (2)
— Xaquetas: 7,5%	- D'estameña: (1) (1) (1) - De pana: (1)
— Refaxos: 5,6%	- De bayeta mariella: (1) (1) (1)
— Pañuelos: 56,6%	- De llienzu: (10) (6) (6) (8) (6) (8) (4) (8) (15) (3) (9) (6) (8) (8) (8) (6) (6) (6) (6) (6) - D'estapilla: (2) (5) (3) (2) (1) (3)
— Sayas: 28,3%	- De felisa: (1) (1) (1) - D'estameña: (1) (1) (1) - De Segovia: (2) (2) (1) - De tienda: (1) (1) (1) - De pañu: (1) (1) (1)
— Calcetas: 5,6%	- Por pares: (2) (2) (2)

(*) Ponse ente paréntesis el númeru de prendas, del tipu indicáu, que ca novia llevaba nel axuar. Ponse tamién el porcentax de prendas en relación col total de contratos matrimoniales.

b) Vestíu de boda (26,4%):

- Ensin especificare: (1) (1) (1) (1) (1) (1/2) (1) (1/2) (1/2) (1) (1)
- D'estameñica: (1) (1) (1)

c) Camisas (54,7%):

- De llienzu: (15) (6) (6) (8) (6) (4) (8) (17) (3) (9) (6) (8) (7) (8) (8) (3) (4) (8)
- D'estopa: (8) (8) (8) (6) (6) (6) (16) (4) (6) (5) (3)

d) Vestíos ordinarios ya festivos: Cítanse nel 56% los matrimoniales, ensin esclariare la sua naturaleza, elementos ya número, etc.

2.—Roupa pa la casa.

- a) Mantas: 52,8%
 - Llana: (2) (2) (2) (2) (2) (2) (2) (2) (2) (2) (2) (2) (2) (2) (2) (2) (2) (2)
 - Sayal: (2) (2) (2) (2) (2) (2) (2) (2) (2)
- b) Sábanas: 47,1%
 - De llienzu: (1) (2) (2) (1) (2) (1) (1) (2) (2) (2) (1) (1) (2) (1)
 - D'estopa: (1) (1) (2) (1) (2) (1)
 - De mediana: (1) (1) (2) (1) (2)
- c) Manteles: 37,7%
 - Número de varas: (5) (5) (4) (5) (5) (5)
 - De mesa: (1) (2) (1) (1) (2) (1) (1) (1) (1) (1) (1) (1) (2) (1)
- d) Paños de manos: 35,8%
 - Ensin especificare: (1) (2) (1) (2) (2) (2) (1) (2) (2) (1) (1) (2) (1) (2)
 - De llinu: (1) (1) (1) (1)
- e) Servilletas: 22,6%
 - Ensin especificare: (2) (3) (2) (2) (2) (2) (2) (2) (2) (2) (3) (1) (2)
- f) Almogadas: 15,0%
 - Ensin especificare: (3) (1) (1) (3) (1) (1) (3) (2)
- g) Llinu: 9,4%
 - Una arrouba: (1) (1) (1) (1) (1)

3.—Útiles para el hogar

- a) Arcas: (13,2%): (1) (1) (1) (1) (1) (1).
- b) Arquinas: (9,4%): (1) (1) (1) (1) (1).

(90%) ya suel faese una descripción curiosa de los sous elementos (véase Cuadru n.º 4). Los tres grades conxuntos formaos por roupas d'usu personal, las roupas pa la casa ya los enseres son cuasi los componentes únicos del axuar. Lo que más apaez son los texíos torpes (lana, llinu, estameña, pañu, estopa...), nos dous tipos de roupa, pero ente las d'usu personal, las chamadas d'adornu, mui-tu frecuentes ya variadas (mantiellas, dengues, xubones, etc.)alcontramos texíos de dalguna calidá (pañu de Segovia, bayeta, terciopelu) polo que pue dicise que yeran un verdadeiru tesouru familiar pa llucir nos días especiales. Outras prendas, de xuru más usadas (tanto pol número comu pola calidá) son las camisas de llinzu «enfaldadas en estopa» ya los pañuelos de llinzu ya estopiella que muitas mucheres llevaban nuna cantidá que diba dende'l par hasta cuasi la docena ya media. Lo restante del axuar personal completábase conos vestíos pal usu diariu ya pa los días santos ya conu vestíu de boda (o mediu vestíu) «según la costumbre del lugar» ou «como corresponde a la calidad de la contrayente». Unos ya outros, desgraciadamente, nun los atoupamos descritos cona minuciosidá de los anteriores. Pero nel único casu en qu'apaez un noviu que, dientru del capital aportáu al matrimoniu, lleva un vestíu de boda sí se diz con precisión que se compondrá de «chaqueta, chaleco, calzón y montera de paño decente»³³.

Las roupas pa la casa cítanse en cuasi'l 100% de los matrimoniales vaqueiros, escontra'l 27,7% mentáu pa los sedentarios. Pero nun se perciben muitas diferencias en cuantas a las prendas, qu'unos ya outros usan: asina, las descritas nel cuadru número 4, sacadas de los dotes de las novias vaqueiras, son las mesmas qu'alcontramos nas sedentarias. Observarásese que yía un axuar sobre tou práuticu (cobertores, sábanas, almohadas...) ya namás los manteles ya, seguramente, las servilletas, nun respunden a la satisfación d'una necesidá básica.

Finalmente, polo que se refier a los enseres la pro-beza yía xeneral pa tous. Yá mentemos esti apartáu al falar de los dotes ente los campesinos sedentarios.

Nos contratos matrimoniales vaqueiros faise namás mención a arcas ou arquinas, siendo asina que'l Concechu de Navia contrasta con outras zonas d'Asturias no tocante a la riqueza nesta parte del axuar.

En resume, del estudiu fondu del dote sácense referencies abondas pa deducir vezos comunes ente vaqueiros ya xaldos: dende la sua propia existencia, pasando por dellos de los sous componentes hasta las formas de pagu ya plazos pautaos. Pero tamién somos a ver importantes diferencies, unas por mor de la forma dixebrada de vida (fai falta destacar que nos dotes vaqueiros hai distintas especies de ganáu mientras que nun yía asina ente los sedentarios), outras, que nos paecen más interesantes, pola diferencia de riqueza, de la que'l dote yía síntoma ya espresión, ente los dous grupos qu'estudiamos. Vese más disponibilidá de los vaqueiros al axeitar el dote en cuantas al valor total, a l'aportación de dineiru efeutivu ya al valor del axuar. Namás la distribución de plazos de pagu paez indicar más poder económicu de los sedentarios, qu'adelantan el pagu primero que los vaqueiros. Pero nun nos paez que seya ésta la interpretación correuta. Pola cueta, afitamos qu'asina confírmase la realidá que los outros indicadores nos fain barruntar. Efeutivamente, aguantar a pagar el dote débese a los mandantes. Asina, tien que se pensar nel importante papel xugáu pola necesidá de tener dineiru metálicu escontra las deudas. Yá anteriormente tiense feitu referencia al usu del dote con esa finalidá ya tiense puestu dellos exemplos comu pudimos poner outros. Sicasí, na nuestra muestra enxamás alcontramos tal cousa en matrimoniales vaqueiros.

¿D'ú vien esta capacidá económica superior que paecen tener los vaqueiros? Namás podemos faer conxeturas, dau el xacer del nuesu trabachu, ya asina yía posible qu'esto tenga que ver cona sua riqueza ganadera (qu'ates-tigan los dotes), siempre fácil de tresformar en moneda, conos beneficios na práutica mui común ente los vaqueiros de l'arriería ya mesmamente, yía posible, cona sua conocida artería pa nun pagar impuestos, comu aseguran

tolos especialistas nel tema, por mor de la movilidad de la sua vida treshumante.

4. CONCLUSIONES CABERAS

Nas llinias d'aniciu d'esti artículu queríamos chegar a un conocimientu más fondu de la sociedad familiar del Concechu de Navia pol estudiu sistemáticu de los muitos contratos matrimoniales, suscritos ante notariu ya conservaos nel A. H. P. d'Uviéu. So la muestra aleatoria de 340 contratos fiximos un análisis, cuantitativu ya cualitativu, centráu naqueellos seutores sociales que, tando bien representaos na nuesa muestra (el 97% del total), yeran p'apurrios conclusiones valoratibles so los vezos familiares regulables polas escrituras de matrimoniu. Campesinos sedentarios (84,5%) ya vaqueiros d'alzada (15,5%), coesistentes parte del anu nel Concechu, fonon l'oxetu la nuesa atención, apaeciendo comu dous grupos sociales que, anque dixebraos por una fonda segregación entovía na época del estudiu, tienen respeutu al matrimoniu vezos abondo paecíos: endogamia social —ya grupal ente los vaqueiros—, exogamia xeográfica ya baxos porcentaxes de consanguinidad son las primeras conclusiones que fuimos a sacar del estudiu de la fonte. Ya, tou ello, relacionable más que con una inconsciente aspiración de la solidaridá grupal, comu pa los vaqueiros se pretende, conos planteamientos d'una estratexa matrimonial na que la busca del mechor dote emburria pa dir más allá de las llindes del llugar, la parroquia ya, mesmamente, el concechu.

En segundu llugar, el recurrir al contratu matrimonial pa prauticar la mechora valnos pa faer una valoración de la importancia que tien esta institución xurídica pa garantizar la tresmisión indivisa del patrimoniü familiar inmueble ya, al mesmu tiempu, comu axeitadora d'un grupu domésticu, según el modelu de familia troncal ou múltiple, afitáu nesti patrimoniü nel que las relaciones

familiares reflexan el calter xerárquicu de toa formación social tradicional.

Finalmente, l'estudiu'l dote yía una muestra de las únicas diferencias importantes de comportamientu ente los campesinos sedentarios ya los vaqueiros d'alzada. Pero éstas vienen más de la dixebra na forma de vida ya de la capacidá económica que de la sua utilización ya significáu. Son más diverxencias de caráuter cuantitativu que cualitativu.

De las cousas yá dichas paeznos que se deduz que quedan cumplíos los oxetivos propuestos. Ya pa con ello, demostramos tamién la validez d'una fonte comu los contratos matrimoniales, pal conocimientu de las actitudes coleutivas ante la familia, unu de los campos más carauterísticos de lo que, na hestoria social, conocemos col nome d'hestoria de las mentalidaes o del «tercer nivel».

NOTES

(1) Usar las actas de matrimoniu, suscritas delante notariu, comu fonte pal conocimientu de la sociedá familiar yía una práutica mui común ente los hestoriadores franceses, sobre tou los especialistas nel Antiguu Réxime. Abúltanos escesivo relacionar tolos trabachos qu'hai feitos. Mentaremos namás los nomes de A. Poitrineau, H. Michel, E. Dravasa, J. Vincent... N'España, ya dientru la metodoloxía repullecida pola hestoriografía francesa, destacan las aportaciones del Departamento de Historia Moderna de la Universidad de Santiago de Compostela, empobináu por A. Eiras Roel. Ver, por exemplu, M. C. Burgo López, *Niveles sociales y relaciones matrimoniales en Santiago y su comarca (1640-1750), a través de las escrituras de dote ya Hilario Rodríguez Ferreiro, Estructura y comportamiento de la familia rural gallega: los campesinos del Morrazo en el siglo XVIII*. Entrambos artículos espublizándose nas *Actas del II Coloquio de Metodología Histórica aplicada. La documentación notarial y la Historia*, Vol. I, páx. 177-199 ya 439-458 respetivamente, Servicio de Publicaciones de la Universidad de Santiago de Compostela, 1984.

P'Asturias, A. Fernández Pérez ya J. Antonio Vaquero Iglesias, "Mentalidades", en David Ruíz ya outros, *Asturias Contemporánea. Síntesis histórica, textos y documentos*, Madrid, Siglo XXI, 1981, ya especialmente, *Estructuras familiares y sistemas hereditarios en la sociedad rural tradicional asturiana: El concejo de Caso en el siglo XIX*, en *Hispania, revista española de Historia*, XLIV, 1984, páxs. 517-547. J. Antonio Vaquero Iglesias trató outra vuelta'l tema en *Sociedad familiar, familia troncal y vaqueiros de alzada en el concejo de Llanera en el siglo XIX*, «Lletres Asturianas», n.º 22, Uviéu, 1986, páxs. 53-57.

(2) So la importancia que tien pa los estudios d'Hestoria social l'usu sistemáticu de Protocolos notariales asgaya ver *Actas del II Coloquio de Metodología Histórica aplicada. La documentación notarial y la Historia*, Santiago de Compostela, 1984.

(2 bis) L'estudiu la familia, dende'l puntu vista hestóricu, arrinca de la obra pionera de Ph. Aries *L'enfant et la vie familiale sous l'Ancien Regime*. Dende entós, anu 1960, siguieron darréu muias investigaciones. Alcorde-mos, comu exemplos más destacaos, las contribuciones de J. L. Flandrin, P. Laslett, F. Lebrun ya las frecuentes incursiones que nel tema fain diversos autores a traviés de la Rev. *Annales*, que, outramente, n'atendiendo la importancia del tema, dedicóu un número especial al mesmu, entituláu *Familie et Société*, correspondiente a los meses de San Xuan ya Outubre del anu 1972, editáu outra vuelta nel anu 1983. Hai poucu tiempu F. Chacon ya outros fixenon una aproximación al estudiu la familia na España del Antigu Réxime: *La familia en la España mediterránea (siglos XV ya XIX)*, Barcelona, Crítica, 1987.

(3) Concechu asturianu allugáu na marina de la punta occidental de la rexón ya qu'abarcaba, hasta'l momentu hestóricu oxetu del nuesu estudiu, unos 231 Kms. cuadraos. Esta superficie yera la suma de la sua actual ya la de las parroquias de San Salvador de la Montaña de Ríunegru (25,4 Kms. cuadraos) integrada nel Concechu Valdés nel anu 1871 ya de la parroquia de Villayón (güei concechu del mesmu nome, con 128 Kms. cuadraos), estremada nel anu 1869. De relieve sonce, al sur alcuéntrase una prolongación del Cordal Prellitoral, que forma una zona diferenciada de la gran rasa litoral. Esta zona valiu, comu n'otros concechos vecinos, pa qu'allí s'asitiaran deijas brañas de branu de los vaqueiros d'alzada.

(4) Pa conocer cuál yía la proporción de matrimonios que faen contratu delante notariu fai falta saber el número de sumas feitas nel concechu ente 1775 ya 1874. Pa faelo fairía falta usar los Llibros de Matrimoniu parroquiales. Podemos chegar a una aproximación conos 6.663 h. que'l Censu de 1860 atribúi-lly al concechu (ver nomenclator correspondiente). Si a dicha población-lly aplicamos la tasa de nupcialidá media del 8 por mil tenemos la cantidá de 5.550 xunturas feitas nel periodu indicáu, de los que 3.400 fixeron contratu de matrimoniu escrituráu, ou seya, el 63,7%. Ésti yía un porcentax considerable que-y da a la fonte nel Concechu de Navia una representatividá mui grande, comparable a la que se chega en Francia, onde va del 60 al 90% nel Antigu Réxime (estudios de Daumard ya Furet, Garden ya Poitrineau respetu a París, Lyon ya Auvergne respetivamente).

(5) Seríase pa chegar a los mesmos fines por outras vías comu la testamentaria, pero'l matrimonial ofrez evidentes ventaxas pa los otorgantes, sobre tou cuando, comu más alantre veremos, lleva tamién mechora.

(5 bis) Trabachar conos 3.400 documentos taba más allá de lo que podíamos faer ya asina buscamos la forma de que, ensin que los resultaos quedaran ensin valir, reduxéramos el número de matrimoniales estudiaos. Pa ello usando las téunicas d'encuesta, fiximos un muestréu del 10% del conxuntu, ou seya que trabachamos con un total de 340 actas notariales de matrimoniu.

(6) Nun faltan nel entamu declaratoriu outras referencias indireutas a determinaos comportamientos propios de la sociedad tradicional asturiana. Asina, dizse en muios casos que'l documentu ta feitu «en el pórticu de la Iglesia (de la parroquia correspondiente)», qu'unque se pue interpretar comu un simple asuntu de comodidá, paeznos más outru de los muios síntomas de la presencia imminente de la institución eclesiástica nos actos de la vida cotidiana. Tamién s'alucen xestos simbólicos comu'l de que los contrayentes ratifiquen esternamente'l contratu firmáu «dándose la mano derecha».

(7) Del estudiu sociolóxicu de los 340 matrimoniales que constitúin la muestra sacamos estos resultaos no tocante a los contrayentes:

	Novios		Novias	
Llabradores cultivadores ...	320	(94,2%)	323	(95,1%)
Llabradores propietarios ..	10	(2,0%)	7	(2,0%)
Propietarios nobles	4	(1,1%)	4	(1,1%)
Ensin clasificare	6	(1,7%)	6	(1,7%)

(8) La presencia los vaqueiros treshumantes nestas brañas va dende'l San Miguel de Setiembre d'un anu hasta'l San Miguel de Mayu del siguiente. Asítianse los llugares de braña nas parroquias de La Polavieya (El Bidulare, Concernosu...), Anlleo (La Braña'l Ríu), Piñeira (Busmargalín), Ponticella (Bustayallada) ya Riunegru (Busaute, Busantiane, Arnizu...), anque esta última integróuse nel Concechu Valdés nel anu 1851.

(9) Chegamos a esta conclusión afitándonos nos llugares de residencia que los contratos matrimoniales atribúin a los otorgantes ya contrayentes ya nos apellíos de los mesmos (Parrondo, Ganceo, Gavilán, Ardura...) que toulos investigadores identifican comu propios de Vaqueiros. Sicasi, nun podemos asegurar que tous ellos fueran treshumantes nesi momentu, anque sí yia un índiz valoratible que la mayoría los contratos tan feitos nos meses d'estancia nel concechu, concentrándose nos anteriores a la xubida a los puertos (abril ya mayu) con un 31,1% del total ya nos que siguen darréu al descensu (setiembre ya outubre) con un 24,4%. Mientras, namás el 13% de los matrimonios correspuenden a los tres meses de branu. Esta baxa proporción puese relacionar cono baxu númeru d'habitantes vaqueiros de las brañas del concechu que daquella tendían a nun se movere.

(10) Véase nesi sen el nuesu trabachu entituláu *Estructuras familiares y sistemas hereditarios...*, yá citáu, nel qu'usando los *Libros de Matrimonio* de la parroquia d'Orlé. arrexexada na montaña del Concechu Casu, atoupanos una fuerte tendencia a la endogamia llocal.

(11) Dende G. M. Xovellanos hasta R. Baragaño, pasando por B. Acevedo Huelves ya J. Uría.

(12) M. Lardizábal, *Apología por los Agotes de Navarra, y los Chuetas de Mallorca, con una breve digresión a los Vaqueiros de Asturias*, 1786.

(13) A. García Martínez, *Análisis del sistema de parentesco de los vaqueiros de alzada de Asturias*. B.I.D.E.A., 105-106, 1982.

(13 bis) Idem., páx. 289.

(14) Idem. páx. 290-291.

(14 bis) Hipótesis sostenida por A. García Martínez na obra yá citada, páx. 196.

(15) Paez afitare la nuesa suposición el feitu de que nun concechu comu'l de Casu, onde la práutica del matrimoniu-contratu delantre'l notariu se fai más qu'esceicionalmente, alcontramos una fuerte endogamia llocal, asina comu unas relaciones solidarias a nivel de llugar ou pueblu. Ver los nuegos estudios yá citaos *Estructuras familiares...* ya *La organización coleutiva...*

(16) En realidá la zona más oucidental d'Asturias, de la qu'el Concechu Navia pue tomase comu representativa, forma parte no tocante a la práutica sucesoria d'un área más grande na qu'entra gran parte de Galicia (ver C. Lisón Tolosana, *Antropología cultural de Galicia*, Madrid, Siglo XXI, 1977) caracterizada pol predominiu d'un sistema d'esplotación agraria que s'afita nel contratu de foru que permite al campesinu muita capacidá decisoria sol dominiu útil. Pola cueta, na zona central de la nuesa rexón la unidá básica de producción yía la *casería* arrendada: el campesinu, d'alcuertu cono propietariu, pa conservar ya tresmitir la herencia asóciase con unu de los

heredeiros, xeneralmente por vía matrimonial, pa llevar una parte d'esta herencia (suel ser la mitá ou la terceira parte), pero teniendo manu del restu por si r rumpe la sociedad familiar ya siempre cona promesa del heredeiru asociáu de que llevará la totalidá en morriendo los causantes. Esto yía lo que podemos deducir del estudiu de los contratos de matrimoniu de los concechos de Llangréu, Uviéu ya Xixón, estudiu que queremos completar en futuros trabachos. Outra cousa yía la norma hereditaria que rix nesta zona cuandu se trata de los bienes propiedá del campesinu. Nesti casu prauticase la igualdá dafeitu ente los heredeiros (recuérrase a la mechora en poucos casos), igualdá que pue comprobase a traviés los testamentos ya que yía una norma xeneralizada en dellas zonas del interior, comu fuimos a demostrar pal Concechu Casu. (Ver la obra yá citada de J. A. Vaquero ya Adolfo Fernández, *Estructuras familiares...*).

(16 bis) El cálculo matemáticu de lo que supón la mechora del «terciu y remanente del quinto» orixina falsas interpretaciones ente los investigadores. Dellos exemplos de la sua aplicación a particiones feitas delante'l notariu permítennos afirmar que s'obtién atoupando'l terciu (T) del globu líquidu de bienes ya restando'l cociente a esti globu. A la diferencia aplícase'lly el quinto (Q) ya'l sou cociente súmase al anterior cono que resulta'l valor de la mechora.

Exemplu: *Capital líquidu* = 4.500 reales

$$T = \frac{4.500 \times 1}{3} = 1.500 \text{ reales; } 4.500 - 1.500 = 3.000 \text{ reales}$$

$$Q = \frac{3.000 \times 1}{5} = 600 \text{ reales}$$

$$1.500 + 600 = 2.100 \text{ reales}$$

$$T + Q = \text{MECHORA}$$

(17) Menos frecuentes son outras prácticas xurídicas comu las donaciones *inter vivos* ya *causa mortis*.

(18) L'aproximamos a los testamentos protocolizaos nel Concechu afitanos na hipótesis apuntada: na mayoría d'ellos faise referencia a la mechora namás pa ratificala ya únicamente cuandu'l testador nun foi a usar la vía matrimonial, porque l'heredeiru a amechorar nun se casara entovía, dispón nel testamentu sol asuntu, nel actu ou dando'lly poder a dalguna persona cercana pa qu'al chegare'l momentu faiga las cousas necesarias.

(19) El 40,9% los matrimoniales restantes representan situaciones esceicionales tocantes a contrayentes emancipaos comu veyudos ou veyudas que se casan outra vuelta, llabradores qu'algamanon capital propiu más allá de los puertos ya que quieren testimoniar delante'l notariu lo qu'aportan al matrimoniu, individuos que yá arrecibieron las suas llexítimas, etc.

(20) Asina, por exemplu, Francisco Parrondo ya la sua mucher Mari Garrido, vecinos de la Braña Concernosu, dotan a la sua ficha Marian Antonia con «(...) 200 ducados: bien entendido que después de casados, ella y su futuro esposo, han de vivir con ellos en una unión y compañía, ayudando a llevar las cargas de la casa y así mismo a dotar con todo lo más que puedan a Francisca Parrondo, tanvien su hija soltera, si llegase el caso de contraer matrimonio; y asistirles así mismo en sus indisposiciones, funeraries después de sus dias (...); pero si no acomodasen los genios y huviesen de separarse les han de entregar los 200 ducados (...)» —el subrayáu yía nucu—. A. H. P. d'U., Notariu Juan Antonio Suárez, Anu 1806 (mayu), f.º: s/n.

(21) Veamos una decisión testamentaria na que se diz claramente cuala

yía la forma más frecuente d'actuar. Trátase d'un testamentu nupciativu otorgáu nel anu 1809 por Manuela Parrondo, veyuda ya vecina de la braña La Bidulare, na que diz tener «(...) hijos legítimos a Manuel, Pedro, Juan y Josef García Gavilán; estos últimos se hallan en mi compañía de menor edad; Manuel y Pedro están sirviendo en la presente guerra contra los franceses y Juan que es el segundo hace años que se marchó para Madrid, sin que sepa su paradero; y todos ellos están solteros. Y en atención a que el expresado mi marido (difunto), por su testamento, que otorgó ante el presente escribano, me dejó facultades para que de sus bienes mantase el tercio y remanente del quinto *con los gravámenes que me pareciese a qualquiera hijo o hija que fuese mejor para mí y me pareciese (...)*, es mi deliberada voluntad el mandar como mando y mejoro en el tercio enteramente y remanente del quinto de todos mis bienes y de dicho mi marido (...) *al expresado mi hijo primogénito Manuel; si éste falleciese en la Guerra, a Juan; si a éste le sucediese lo mismo a Pedro y si acaso éste también muriese, a Josef que se halla menor de edad en mi compañía (...)*» —el subrayáu yía nuesu—. A. H. P. d'U., Escribanu Juan Antonio Suárez. Anu 1809 (Payares), fol. s/n.

(22) Margarita Fernández Castrillón, veyuda ya vecina del llugar de Los Molinos (parroquia de Veiga), amechora al sou fichu Lorenzo Fernández en «(...) el tercio y remanente del quinto de todos cuantos bienes posee y azquiera, por lo más bien parado de ellos y mejor a su elección. Así mismo lo elijo desde aora para el fin de sus dias por subcesor suyo en la llevanza del pouso (sic) y colonia íntegra que manejan y cultivan y se obliga a no casar en su compañía a otro hijo ni hija, ni nieto ni nieta, pariente ni extraño (...)». A. H. P. d'U., Notariu: Juan Fco. Flórez Villamil, Anu 1834, fol.: 199-200.

(23) Esto refléxase nos mesmos contratos matrimoniales. Asina suel ocurrir qu'el amechoráu tea presente, solu ou acompañando a outros otorgantes, nel momentu de *colocar* a los outros familiares. En realidá ta presente, cumpliendo la sua obligación pero tamién cuidando los sous intereses, nel 43,0% de las actas notariales de matrimoniu.

(24) Dizse asgaya qu'una de las obligaciones del amechoráu yía «acomodar a los más hermanos e hijos (...) *dándoles lo correspondiente a sus legítimas (...)*» —el subrayáu ye nueso—. A. H. P. d'U., Notariu: Luis Otero Lavandera, Anu 1786, fol.: 57-58.

N'otros casos faise más precisión entovía, identificando con toa claridá'l dote ya la llexítima.

Exemplu: «(...) cuya manda le hacen madre e hijo (mejorado) a su hija y hermana (dotada) con el de que contemplan ser la suficiente paterna (legítima) que tiene heredado y por lo que le corresponda de dicha su madre (...)». A. H. P. d'U., Notariu: Francisco Otero Lavandera, Anu 1794, fol.: 37-39.

(25) Puese comprobar esta forma pagu a través de los mesmos matrimoniales. En efetu, raramente entran a formar parte del capital de los fichos varones non amechoraos nin del dote (comu veremos llueu) outros bienes que nun seyan los indicaos.

(26) Xeneralmente estas caberas cargas son a cuenta del quintu de llivre disposición: D.^a Josefa Méndez Trelles, veyuda ya vecina del llugar de Villacondide (parroquia del mesmu nome) amechora al sou fichu D. José María López Acevedo ya

«(...) Añade que por cuenta del quinto ha de soportar los gastos que cause y a su muerte deje por solventar relativos a su última enfermedad y los de su entierro y funeral (...)».

A. H. P. d'U., Notariu: José García Loredó, Anu 1863, fol.: 15.

(27) A. H. P. d'U., Notariu: Francisco Otero Lavandera, Anu 1863, fol.: 15.

(28) El dote pue tener outros orixenes que nun seyan los de los familiares de la novia. Asina yía posible que seya'l mesmu noviu'l del dote, especialmente cuando yía veyudu: Vicente Gayo, veyudu ya vecín de la Braña de Monterizu de la parroquia de Narabal (Concechu Tinéu).

«(...) atendiendo al amor y cariño que profese a la contrayente su futura esposa, por si sucediese quedar viuda (...) le deja para que ella misma lo usufrute y beneficie, aprovechando sus producciones, por los días de su vida y no más, la mitad del huerto del Cavadoiro (...) y una cabaña de cabras (...)».

A. H. P. d'U., Notariu: Juan Antonio Suárez, Anu 1813, fol.: s/n.

(29) Yía frecuente que, nas mesmas escrituras de matrimoniu ou n'outras feitas namás pa tal efeutu, s'estableza un conxuntu de bienes raíces, propiedá de la familia del contrayente, comu fianza del dote. Del mesmu xeitu la muche: tien siempre'l recursu, nel casu del que-lly paeza que peligra la integridá del dote, en tou ou en parte, de plantear xuridicamente la sua defensa entamando la mesma mediante las chamadas *Escrituras de defensa de dote*. suscritas delante notariu ya que s'atoupan asgaya nos protocolos conservaos nel A. H. P. d'U. Finalmente, nas escrituras de testamentu, cuando l'otorgante yía l'home ou entrambos esposos, suel acordase'l valor de lo aportao pola muher al matrimoniu ya'l caráuter prioritariu que tien la sua devolución na lliquidación de la herencia.

(29 bis) Nunos casos, los pas de la contrayente faise cargu de las deudas que tien la outra parte: D. Sebastián González de la Vega carga con «(...) la satisfacción a Francisco Pérez, tavernero de la parroquia, 300 reales vellón en cuenta de mayor partida que le está debiendo dicho D. Juan Trelles (padre del contrayente) (...)».

A. H. P. d'U., Notariu: Juan Antonio Suárez, Anu 1808, fol.: s/n.

N'otros casos, el dote de la contrayente val pa cancelar deudas como noviu. L'exemplu que vien darréu muéstranos, amás, crudamente los motivos estrictamente económicos del matrimoniu-contratu: D.^a María Ana León, veyuda ya vecina del llugar de Valle (parroquia de Ponticella), ma de la contrayente, esplica cómo ella quedóu al frente de la explotación del caseriu

«(...) y satisfizo diferentes créditos que había quedado a la muerte de dicho su marido con el fin de que la posesión no sufriera el menor perjuicio (y) había deliberado colocar a dicha su hija, como de unos 16 años, con el compareciente, en atención a que el mismo en los diferentes años que residió en la Villa y Corte de Madrid ya con tal intento le había remitido las partidas de dinero (en total 2.560 reales) con el objeto de sacarla de los apuros en que se hallaba (...)». En compensación, dota a la sua ficha con 6.000 reales pero «(...) en calidá de vivir en su compañía (...)» ya namás pagadeiros «(...) nel casu de separación (...)».

A. H. P. d'U., Notariu: José García Loreda, Anu 1855, fol.: 175-175.

(30) Trátase de matrimoniales nos que la contrayente pertenez a la pequena nobleza local ou'l grupu de llabradores propietarios. Por exemplu, D. Domingo Fernández, vecín del Puertu de Veiga, dota a la sua ficha D.^a Rosa Fernández con 600 ducaos

«(...) y además por razón de vestidos y ajuares: nueve camisas nuevas, las ordinarias de su uso, cuatro savanas nuevas de lienzo, tres savanas del agua, dos mesas de manteles, cuatro servilletas, cuatro paños de manos, ocho almoadas, una colcha nueva, una manta, dos covertores nuevos. Y en cuanto a medias, zapatos, evillas, alajas de plata y ropa de color y mantillas, redelillos y pañuelos toda la que tiene la D.^a Rosa de suio y la que le quedó de su madre (...)».

A. H. P. d'U., Notariu, Francisco José Cuervo, Anu 1794, fol.: 35.

(31) Siempre, ou cuasi siempre, apúntase que l'axuar tien que ser tasáu «(...) por personas inteligentes (...)», fayendo, dellas veces, que seyan tres:

dous representando los intereses d'entrabas familias otorgantes ya la tercera pa mediar en casu de que nun haiga alcuierdu.

(32) Hai muitas alusiones a telares comu elementos del dote.

(33) Trátase d'un vecín del llugar d'Ordobaya (parroquia de San Salvador de la Montaña de Ríunegru).

A. H. P. d'U., Notariu: Roque Antonio Fernández Calzada, Anu 1823, fol.: 75.

* * *